

Shirley Angela - Eisdén:

"Interesante, fascinante, cu hopi reto": asina e ta defini su trabao di periodista

Dia 1 di mei ta dia cu internacionalmente ta dedica atencion na "e trahado". No ta importa ki tipo di trabao cada persona ta haci. Cada ken cu ta traha pa gana su pan di cada dia ta un trahado.

Cada uno cu ta traha sea na cas of pafo di cas na su manera ta contribui na progreso di nos isla.

DIARIO den su edicion special dedica na Dia di Labor, a entrevista un trahado den medio di comunicacion aki na Aruba. Ta trata di Shirley Angela-Eisdén.

Shirley Angela-Eisdén tin ocho aña ta move riba tereno periodistico na Aruba. Mayoria di e tempo aki el a pas'e na radio. Aunke e ta bisa cu e no tin un preferencia special pa un ke otro medio di comunicacion (e ta interesa den tur), circunstancianan semper a push'e - despues di su estudio na School voor de Journalistiek na Utrecht - den direccion principalmente di radio, tanto na Hulanda como aki na Aruba. "Na Hulanda mi a yega di traha na radio, corant y television. Aki na Aruba mi a traha pa un periodo relativamente cortico tambe pa un corant di Corsow, pa cual mi tabata su representante riba nos isla". Banda di su experiencia na radio el a yega di produci y tambe presenta algun programa di television cu a cosecha hopi interes di publico local. Actualmente e ta skirbi como freelance pa un revista Hulandes y pa un revista specializa na Corsow, mientras cu e ta coresponsal pa Radio Nederland Wereldomroep.

"Mi trabao fulltime mes ta na Radio 1270 AM Stereo, caminda mi ta atende e Departamento di Informacion. E departamento aki ta consisti di e seccion di noticia, rubrica di noticia deportivo, talkshownan y programanan di opinion, pasobra Radio 1270 ta un talkradio".

Pa siman Shirley ta percura banda di su trabao den e redaccion di noticia Panorama Mundial tambe pa tres diferente tipo di talkshow riba e banda AM 1270



den fin di siman. Nan ta diabierna mainta "Mas Lat Mainta", cu ta un programa di call-in combina di Z-86 na Corsow y Radio 1270; diasabra mainta "Brunch cu Shirley", un talkshow cu invitado y diasabra atardi e programa di opinion titula "Opinion" cu comentaristanan fiho. Contando e programa Lifestyle aden e emisora tin cuatro diferente tipo di talkshow den su programacion.

Shirley desde hoben tabatin un tereno di interes gratin. Como adolescente e tabata duda si e lo a bay studia sea periodismo, ley of historia. "Finalmente mi a dicidi di bay studia periodismo tempo mi tabata studia ley na Universidad di Antiyas. Despues di dos aña e estudio ey a parce tog demasiado strak y mara na cierto structuranan cu no tabata duna mi tur loke mi tabata busca".

Su decision pa haci periodismo a habri porta p'e satisfice su curiosidad di ta al tanto di lokenan ta pasa den comunidad, profundiza y sigui e desaroyonan ey di acerca.

Con Shirley ta haña e trabao di periodista pa hende muhe?

"Interesante, fascinante, cu hopi reto, yen di tereno brak pa explora ainda, especialmente aki na Aruba. Alaves duro, cu hopi presion y cu cierto obstaculonan cu de vez en cuando por stroba e periodista di alcanza su meta completamente, esta di informa su publico manera debe ser. Periodismo riba su mes ta exige tambe oranan largo di trabao haciendo bo 'huiswerk', esta si e periodista kier haci su trabao bon. Pero esey no kier men cu bo ta tende mi keha. Esaki ta un profesion cu ami a scoge p'e concientemente y na mi manera mi ta busca solucion pa obstaculonan cu por surgi.

Den e trabao aki bo mester ta creativo y flexibel. Mi ta keda mantene como obhetivo haci mi trabao segun mi consenshi y lo miho posibel".

Shirley ta kere cu tur e elementonan cu el a menciona ta conta tanto pa hende hombre como hende muhe periodista. Pa hende muhe ta bini acerca, lamentablemente mescos cu den hopi otro profesion, cu e mester demostra su mes mas p'e haña e posicion y e reconocimiento cu e merece.

"Den algun caso e mester

tuma un postura fuerte pa muestra cu e ta serio den su profesion y cu e ta actuando for di un punto di bista profesional".

Riba e pregunta con e hendenan ta reacciona riba Shirley como un periodista muhe fuerte, el a prefera di haci distincion entre e hendenan cu e mester entrevista den su trabao y e publico oyente.

Segun Shirley e ta ripara un desaroyo den e ultimo añanan cu e ta trahando na Aruba. Si na cuminzamento di su funcionamiento aki tabatin hendenan (entrevistadonan) cu no por a comprende ni aprecia su forma directo y critico di traha, awendia e mesun hendenan aki ta acerc'e pa traha hunto.

"Sigur den cuminzamento tabatin hende cu no por a 'deal' cu e hecho cu un periodista muhe ta cuestiona nan pensamiento of maneho fuertemente", e ta bisa.

Pa loke ta e publico oyente Shirley a remarca cu esaki ta e grupo cu for di principio a acept'e y a apoy'e pa su forma di traha y estilo propio.

Semper el a trece na radio loke ta biba den pueblo, loke ta pueblo su preocupacion y interes. Y e ta evalua na manera critico den ki forma su programanan ta yuda sirbi interes general. Awe pa awe Shirley por bisa cu por lo general especialmente e publico oyente tin hopi aprecio pa su trabao. Segun Shirley Radio 1270 tin un publico oyente sumamente conciente y critico cu a custrumbr cu bon programa.

E oyentenan aki lo hala nos oreas asina nos desvia di e maneho cu nos mes a bin ta sigui pa ultimo tres aña y pico, asina e periodista ta bisa.

El a muestra cu trabao na radio den cierto sentido ta mescos cu cualkier otro tipo di trabao y e ta lamenta e impresion erroneo cu ta biba den comunidad cu radio ta

un sorto di pasatempo y cu aki no ta trata di un trabao tempo completo.

"Por favor no puntra mi con mi ta combina mi trabao cu mi famia. Mi no tin un regla magico cu mi ta sigui.

Despues di trabao mi ta reserva parti atardi lat y cuminzamento di anochi pa mi yunan. Mi ta purba tanto cu mi por di haci di e rato cu mi ta pasa cu nan 'quality time'. E momentonan ey ta sagrado, mescos cu diadomingo. Aunke cu e asunto di diadomingo ey no ta funciona tur ora. Semper tin un ke otro telefon interesante cu datonan pa trabao cu bo mester atende, informacion cu bo mester pasa aden of un ke otro 'afspraak'. Mas lat anochi mi ta usa pa pasa den literatura cu ta relevante pa mi trabao diario of cu ta tene mi al tanto di desaroyonan nobo den mi profesion.

Mi ta consulta regularmente si cu mi famia (casa y yunan). Na momento cu nan ta considera cu mi ta exagera nan ta laga mi sa esey bon cla y mi ta purba drai bek. Esaki t'e miho 'feedback' cu mi por haña.

Asina Shirley a referi parcialmente na con e ta combina cas y trabao.

Shirley a muestra cu el a haci di su hobby su profesion y pesey e ta traha tambe cu hopi placer. Segun e no ta importa ki tipo di trabao bo ta haci, basta bo ta haci'e cu dignidad.

"Nos tur lo aporta mas na nos pais si nos ta haña satisfaccion den nos trabao. Y si bo ta puntra mi si mi ta haña satisfaccion den mi trabao, mi contesta ta si mi oyentenan ta satisfecho anto no por otro cu mi tambe ta satisfecho. Si mi hefe tambe ta satisfecho cu mi trabao? Wel ... kizas e lo no bis'e cu asina tanto palabra, pero mi ta kere cu e tin tur motibo pa ta satisfecho. Si!"

Asina e periodista di Radio 1270 a termina nos entrevista.

TELEFONAN DI DIARIO
826747- FAX 828551